

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



**FAAVAEINA 1839 O LE SULU SAMOA TESEMA 2021**

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 30 - website: [www.cccs.org.ws](http://www.cccs.org.ws)

## TATALA LE 'KERISIMASI I LOU AIGA' A LE EFKSTV



## MALUMALU 'MANAI MAI LE LAGI', EFKS MAOTA



# FAASINO UPU

1. O LE LAUGA	2
2. KERISIMASI I LOU AIGA	3
3. FAAMANUIA MAI LE TAITAIFONO	4
4. MALUMALU EFKS VAIPU'A	5
5. FAAMANUIA A OLOMANU	6
6. FAAPAIA 'AFEGA O LE ALOFA'	6
7. FAAPAIA MAOTA EFKS APIA	7
8. OSI FEAGAIGA EFKS LALOMANU	7
9. O LE PEROFETA MULIMULI	8
10. OSI FEAGAIGA EFKS SOGI	11
11. FAAPAIA MAOTA EFKS AUALA	11
12. FAAMANUIA O LE TAUSAGA FOU	12
13. O E UA FAI I LAGI FOLAUGA	14
14. MALUMALU EFKS MAOTA	15
15. ATA O NISI MATAUPU TUSIA	16

## O LE LAUGA

Tusi Faitau: 1 Peteru 2: 1 – 10 . Matua: *“A o outou o le tupulaga ua filifilia outou, o tupu ma ositaulaga, o le nuu paia, ma le nuu na faatauina mai e le Atua ina ia outou ta'uta'u atu ana galuega lelei.”*

Manatu Autū: FILIFILIA MO SE FAAMOEMOE FAAPITOA

O le valaauina o se tagata mo se faamoemoe faapitoa, ou te talitonu o le matāfaioi tupito lea a le Atua. O tagata uma ua fananau mai, ua taoto ai le faamoemoe paia o le Atua mo lona soifua. Silasila foi i le valaauina o Ieremia, na fetalai le Atua, *“Na a'u iloa oe a o le'i faia oe e a'u i le manava; na a'u faapaiaina oe a o le'i fanau mai oe, na a'u tofia oe e fai ma perofeta i nuu.” Iere.1.* O le upu moni, e maofa le mafaufau i fuafuaga loloto a le Alii. O le fesili ua tula'i mai, E faapefea ona tatou iloa le faamoemoe o le Atua mo lo tatou ola? Saili i le Atua e ala i le tatalo, auā o loo malamalama lava a'oa'oga a lo tatou Alii, e pei o le tu'itu'itu ona tatala mai ai lea ia te oe, saili ona maua ai lea, ole atu ona tōina mai ai lea ia te oe. E manatua i lo'u loto le feiloa'iga a Iesu ma Saulo i le ala i Tamaseko, na fetalai atu ai Iesu, *'Saulo e, aiseā ua e sauā mai ai ia te a'u?'* Na matuā faate'ia lava Saulo i le mea ua tupu, ua faapea atu, *'O ai ea oe?'* A ua tali mai o ia, *'O a'u o Iesu, ua e sauā mai i ai.'* Ona fai mai lea o Saulo, *'Le Alii e, o le a se mea e te finagalo i ai ou te faia?'* A ua tali atu Iesu, ua ou valaauina oe e fai ma ipu o le Tala Lelei, e momoli lo'u igoa i nuu ese. Sa

lilo i le manatu o Saulo o le faamoemoe faapitoa lea na soifua mai ai o ia i le lalolagi. E ma'eu le manaia o le suiga o le olaga o Saulo le faresaio sauā. O lea ua avea ma aporetolo o nuu ese, ua suia lona igoa ia Paulo.

I le vaega o le Tusi faitau o lenei aso, o loo tautala faamalosi mai ai le aporetolo o Peteru i tagata o le Ekalesia, ina ia inoino i le amio leaga ma lafoa'i tu'inanauga o le tino, a ia taumafai e soifua mamā ma ola faapa'iaina. O le naunautaiga o Peteru, ia toe fanaufouina e pei o tama meamea ua tausii ma fafaga lona soifua i le suasusu e lē suia. Ioe, le au uso e, e faapena le tagata ua mafuli lona olaga i le itu faaleagaga, ua naunau le loto e fia faalogo i Afioga paia a le Atua, e pei o la Iesu, *“E lē na o mea e 'ai e ola ai le tagata..”*, a o Lana afioga e tulei mai i Lona fofoga, ina ia saunia i tatou uma mo Lana faaolataga. Atonu o le mea foi lea na la faatusa ai Lona nuu o Isaraelu, i le maa na tuulafoa'iina e tagata, peita'i ua filifilia e le Atua, e avea mona nuu na te fa'aali atu ana galuega lelei i le lalolagi uma.

Le au uso pele ona o Keriso, ua valaauina i tatou e le Atua mo Lona faamoemoe faapitoa, ina ia tatou fausia Lona fale apitaga e afio ai, e lē o se fale e fausia i la'au ma ma'a, a o le fale e fausia i tagata – o le Ekalesia lea. O i tatou o itu tino o le Ekalesia, a o Iesu Keriso o le Ao lea o le Ekalesia. Ua filifilia i tatou mo lenei faamoemoe faapitoa, ina ia avea i tatou e auala mai ai faamanuiaga mo isi tagata. O ai na manatu o le a faaeaina i tatou ona o le galuega faaola a Keriso! O lea ua mae'a le galuega na maliu puapuagā ai le Alii i luga o le satauro. O le faamoemoe faapitoa lea na auina mai ai e le Atua Lona Alo pele e toatasi, ina ia lē fano se tasi e talitonu ma faatuatua ia te Ia, a ia maua e tagata uma le ola e faavavau.

Le Ekalesia pele a Iesu Keriso, ua lē natia le tulaga faigata ua aliali mai i nei aso, ua faatupulaia le mau faafitauli ua fesoua'iina ai olaga o tagata, ua lē mautonu tagata po o ai a faalogo i ai, ma ua tauau ai ina faavaivaia le ola faaleagaga o tagata o le Ekalesia. Ou te manatu o le taimi lenei ua tatau ona lagona ai le leo o le Ekalesia, po o le a sona taofi faamataupu silisili i le faafitauli ua tula'i mai, seia faanofa filemu ai le loto popole ma le atuatuvaile. Ou te tautala lava ma le fa'aaloalo, ua taitasi ma valaauina i tatou e le Atua i tiute ma faiva, ina ia taunuu ia te oe ma a'u lona faamoemoe faapitoa. Ua maitauina le vevesi o le lalolagi ona o lenei faama'i oti. Tau lava ina ou faamanatu atu, e leai lava se tasi e sili atu ona malu

pui puia lo tatou ola, na o le Atua lava ia. Afai na faia e le Atua le tagata ua lelei atoatoa, o le fesili, Ua lē lelei ea le galuega a le Atua e pui puia ai o tatou tino mai faama'i? E foliga mai e sili atu le tui na faia e le tagata nai lo le pui puiga faale-natura na faia e le Atua (immune system). E mafai ea ona faaleleia e le tagata le mea na tautigā ai le Atua? 'Aua lava nei faapea. Ia tautuanā le tuualalo a le aposetolo o Peteru, "A o outou o le tupulaga ua filifilia outou, o tupu ma ositaulaga, o le nuu paia, ma le nuu na faatauina mai e le Atua, ina ia outou ta'uta'u atu ana galuega lelei."

Ia manuia ona o Iesu. Amene.

*Saunia: Leauga Faletoese FS,  
EFKS Falealupo-uta,  
Matagaluega ITU O TANE.*

.....

## **KERISIMASI I LOU AIGA**

O le tausaga nei 2021 ua amata ai le polokalame fou a le Televisi a le Ekalesia, le EFKSTV e ta'ua o le KERISIMASI I LOU AIGA (CHRISTMAS WITH YOUR FAMILY). O le polokalame e tasi le itulā o pesepesega, faa-eva-gelia ma siva faaleagaga o le Kerisimasi, e saunia e Aufaipese valaaulia. O le Aso Sa 12 Tesema i le afiafi na amatalia ai le ulua'i polokalame e le EFKS Lotofaga, o susū ai le afioga Taitaifono Fono Tele, susuga Iosefa Uilelea FT ma le Faletua ia Teki. O le susuga lava i le Toeaina na ta'ita'i le sauniga lotu e amata ai lea polokalame, sa faasalalau tu'u sa'o i luga o le EFKSTV, mai le malumalu EFKS Lotofaga. O le afioga i le Tamaitai Palemia, Hon. Fiamē Naomi Mataafa TK, o le tiakono foi o lea Ekalesia, na saunoa i le lauga autū e tatala aloaia ai le faamoemoe, ma ki faola ai mōli o le Kerisimasi. Na auai e molimau le aufaigaluega o le Pulega, faapea le mamalu o le afio'aga o le Sa'o Faapito ma le Aiga paia o Salevalasi, i la'ua na Aliimau o Faleupolu ma le Faletua, Susū ai Sitagata ma le Aiga Sā Sitagatā. O susuga Keresoma Seuala AM ma Titimaea Nafatali AF sa nafa ma le a'oa'oina, taina ma taimia pese ma siva.

Pe a tusa ma le finagalo o le Atua aulia isi Kerisimasi i le lumana'i, ona fa'auau lea ma e ono auai mai ai ma Ekalesia i fafo. Ia manuia le Kerisimasi i lou Aiga, ma le Tausaga Fou fiafia i le mamalu o le EFKS.

## **"KERISIMASI I LOU AIGA"**

*"<sup>10</sup> Aua tou te matata'u; auā faauta, ou te au mai ia te outou le tala lelei o le olioli tele e oo mai i le nuu uma;" Luka 2.*

### **(Upu a le Ta'ita'i, Sauniga Lotu Amata)**

O le tala fiafia lea na momoli mai e agelu, faatasi ma a latou pesepesega malie, i le aiga o leoleo mamoe. Le aiga o tautua tuāvae, faanofo'esea i le vao ona o tiute-leoleo ma fafaga lafu, o atina'e mo le tausiga o tagata, a o faapolopolo mo taulaga osi i le Atua. A o se aiga o feagai ma sauaga; auā e inosia, e lē taualoa, e vaai maualalo i ai le sosaiete, e leai se leo i upufai o saofa'iga o fai i le aai. O le tala lelei o le Kerisimasi - ua faaecaina lou aiga, ua amanaia e le Atua lau tautua. Ua ulua'i fa'aali i lou aiga sa manatu māmā i ai tagata, le tala e sili ona lelei, le fanau mai o le Tama'i Mamoe a le Atua. Ua suia lagona o sauaga sa fai i lou aiga, i lagona faagaetia o le faaecaina, o le olioli ma le fiafia; ua te'a le pogisa sa si'osi'omia ai i lea po, ina ua sulua e le malamalama moni, suia le maalili i le mafanafana ma le loto tele.

A o se tala fiafia foi lea mo le aiga o Tavita, i le faigamalo Isaraelu. Le aiga na tupuga mai ai tupu, suafa ta'uta'ua amata mai ia Tavita, Solomona ma le nofo tuufaasolo o tupu i le nofoalii. E oo mai i lea aso, talofa ua faoa le mamalu, ua faatafea, soloia ma lilo atu i le tala faasolo. O feagai ma sauaga o le toilalo, pulea e nuu ese; na o le momo'o faatali i le Mesia, na te toe lagaina, e aumai le faaolataga. Ua maua tala fiafia - ua fanau mai lou Mesia sa valo'ia, le Fetu o Tavita, le Leona o Iuta, le Tupu o Iutaia. Ua tau foi lou gafa tau-tupu i le Lagi. Auā e igoa o Ia o le Silisili Ese, o le Atua Malosi, o le Tamā o le Faavavau, o le Perenise o le Filemu.

Le au faafofoga ma lau faasausauga maimoa, e tofu i tatou ma to'atūgā i o tatou aiga, i le Ekalesia, le faigamalo ma le atunuu. O avega mamafa i ou tofi, tiute ma faiva; o sauaga, faalavelave ma faafitauli. Le taaviliga o suiga ogaoga, tau saili ni tali ma fofō. Le taua faasaga i le tiapolo faatupu agasala, o faiga amiolētonu ma soliga tulafono. O le tala fiafia mo i tatou uma, lea na aumai e agelu, momoli faatasi mai i a latou pesega mālie, i lena ulua'i Kerisimasi.

Matou te fia so'oso'o tau'au foi, ma fa'auau lea lava galuega, e ala i pesepesega o lena foi Kerisimasi, e logologo le tala ia Iesu Keriso, le Alo o le Atua, Le na fanau mai e maliu, na te ave'ese agasala a le lalolagi. Ia manuia lau faafofoga silasila, ma ia manuia le Kerisimasi i lou aiga. Amene.

---

**SAUNOAGA FAAMANUIA KERISIMASI 2021,**  
**AFIOGA TAITAIFONO FONOTELE**  
**SUSUGA IOSEFA ATAPANA UILELEA FT**

O lea ua faliu le lā o lenei tausaga i lona tauafiafi, ua toe o se aga ona tutu lea o afi o faamalama, ina o le a afu lelea lenei tausaga. A e tatou sula ia le alofa o le Atua ma tatou faapea, “Le Atua e, ua malie fa’alo, ua malie teu, ua malie tama, auā pele o tausala. Ua ta u’u, ua ta sama, ua ta mamafa, ua ta sasala, ua ta iloa fai mea a tagata, e pei o le upu ia Tuamasaga.”

Ua taunuu upu a le perofeta o Isaia, *“A o e faatalitali i le Alii, e toe faafouina lo latou malosi, latou te si’i a’e apa’au e pei o aeto; latou te femo’ei a e lē vaivai; latou te savavali a e lē tigaina.”*

O la le fai Salamo, *“Ou te faafetai i le Alii i aso uma lava, e lē aunoa ona viiga i lo’u gutu. E mitamita lo’u agaga i le Alii, e faalogologo i ai e ua puapugaina, ona latou fiafia ai lea.”*

A e fata ia i fata mamana, paia o le au Ositaulaga, i soo se fata faitaulaga; i la outou galuega saili ma teuteu agaga mo soo se tagata, a e maise Samoa ma lona malo e faavae i le Atua. Fata foi i fata’ula ou paia Samoa. Aiga ma latou tama, o tama ma o latou aiga. Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Fata foi i fata lele ou paia faale malo. I le afio o lau afioga i le Ao mamalu o le Malo o Samoa ma lau Masiofo. Afio lau afioga i le Sui o le Fono Sui Tofia ma lou Faletua. Afio lau afioga i le Tamaitai Palemia, afio lau afioga i le Sui Palemia ma le Kapeneta. Afio lau afioga i le Fofoga Fetalai; afio lau afioga Sui Fofoga Fetalai, afio sui

mamalu o le Fono Faitulafono a Samoa. Afio lau afioga i le Faamasino Sili; mamalu i alii ma tamaitai Faamasino. Afio lau afioga le Peresetene ma le paia i alii ma tamaitai Faamasino o le Faamasinoga o fanua ma suafa, ma le mamalu o le Ofisa o Faamasinoga.

Tau lava ina ou faalanu vai o nofoa, auā ou paia Samoa, e lē toe tau tū-tā mulivaiina, o le sau, e lē lau malo’ia, ma le atu, e lē toe tau seu poposeina. O paia ua uma ona lalafa faavao afu. Ou te lē toe seu tafiliina la le na’a, a e o le a ou seu i matā to’aga.

E fai ma sui o le Laulau o le Fono Tele o lenei tausaga, e faaleoina atu le agaga o le faafetai i le mamalu ma le paia, o le Ekalesia Faapotopotoga Kerisiano Samoa, i Samoa nei ma atunuu i fafo.

I lau afioga i le Taitaifono ma le Laulau, ma le Komiti a le Au Toeaina, faapea laulau ma nofo a Komiti uma o le Ekalesia. Susuga i faafeagaiga taulagi ma outou faletua. Tamā ma Tinā penisione; susuga i A’oa’o, afioga i alii ma tamaitai Tiakono, le mamalu o le Ekalesia e oo i nai a tatou fanau. O upu i faiva o tapalega: Ua lē tini ō, a ua tini pā’ō le uto i lau tautua matavela mo le Atua ma Lana Tala Lelei. E le’i faigofie lo outou tō’ai mai, i lenei masina o le tausaga. Sa matagi taumuaina lou sa. Sa outou fetaia’i ma peau ala ma peau vasa, o peau lagava’a, o peau tagata ma peau tautala. O peau o’o ma peau taoto, o

---

peau taulia ma peau laasia, o peau na ona faafua ae lē fati, ma lona soa o le āuāu ta’a. Sa e laina ma timuia, sa e afugia ma viligia, sa e ma’osi’osia ma puapuagatia; a e sa e galue pea ma le fiafia.

**Le Ekalesia e, ua faamalo galulue, malo finau, malo loto tetele. Faafetai foa’i, faafetai alofa i le Atua ma Lana galuega paia. Ua ovitia le fatuga o upu, e sulaina ai lau tautua ua tau-masuasua, a e o loo sisila fofoga o Keriso le Ao o le Ekalesia, i lau tautua ma lou tautiga ona o Lona suafa.**

**O la Iesu Keriso i le Ekalesia i Filatelefaia, “Ua ou iloa au galuega. Ua e tausia le upu o lo’u onosa’i, o lea foi ou te tausi ai ia te oe i le itu aso e tofotofoina ai oe. O lē manumalo, ou te faia lea ma poutū i le malumalu o lo’u Atua.”**

**Le Ekalesia e, o au galuega lelei uma, sa e tautiga ai i lenei tausaga ona o Keriso, e lē o lilo i le Atua. E leai foi se matāua o lou afu e pa’ū fua i le eleele. O le tatalo e pei o la Paulo, *O’u uso pele e, ia outou tumau ma le lē faagae’etia, ia alualu lo outou faamalosi i le galuega a le Alii ma le lē aunoa, ina ua outou iloa, e lē se mea faalāaogā lo outou tautiga i le Alii.***

**Ia faamanuia atu le Atua i le paia o le Ekalesia Aoao. Ia faamanuia atu foi le Atua ia Samoa, i lana faiga malo, i ona tupu ma ona e’e, ma soo se Samoa i tafa e fia o le lalolagi. Ia outou maua se Kerisimasi, e faatumulia i le filemū ma le manuia, ma le olioli tele, i le alofa ma le agalelei o lo tatou Atua.**

**Soifua ma ia Manuia.**

---

## **FAAPAIA LE MALUMALU** **O LE EFKS VAIPU’A**

O le ulua’i galuega i le faasologa o atina’e na faapa’ia i le faai’uga o le tausaga, le malumalu o le EFKS Vaipu’a o tausia e le susuga Ionatana Tupolo FS ma le faletua ia Lagi. O le Aso Lulu na feiloa’i ai Aiga ma fai le Po Siva, a o le Aso Tofi 16 Tesema, na fai ai Taalolo ma fai le Sauniga Lotu e faapa’ia ai le malumalu fou. O le faletua ia Teki Uilelea na ia ooti le lipine lanu piniki, e tatala aloa’ia ai le galuega; o le afioga i le Matuaofaiva, Vaelua Sene Samau na tauaaoina mai ki ma tatala faitoto’a o le malumalu se’ia ulufale atu le mamalu o le Ekalesia. O le Faifeau Toeaina o le Pulega Salega, susuga Faasavala Leilua FT na ta’ita’iina le sauniga na faatumulia i le mamalu o Toeaina ma Faafeagaiga ma Faletua o le Pulega, Matagaluega Faasaleleaga ma isi itu o le Ekalesia. Sa valaaulia foi le mamalu o le Malo faapea aiga ma uo a le Aulotu.

O le susuga i le faafeagaiga ia Tupolo na saunoa i le tala’aga o le galuega, lea sa amata mai i le tausaga 2016 ona tuu i luma o le Atua i talosaga ma saili seleni mo le faamoemoe. Sa tagi lava i lima le tele o le tamaoiga o lenei galuega, o totoga o le malumalu na ofoina atu e aiga o le Aulotu. O le aso 1 Mati 2021 na tuuina ai loa i lalo le malumalu tuai, ma amata loa le fausia o le malumalu fou. O le Konekarate a Le Evaeva sa nafa ma le galuega e \$754,740 le tau aofa’i, na fausia i le valu masina. Na saunoa le faafeagaiga e faafetaia le tapuaiga a le Ekalesia Aoao i Toeaina ma le aufaigaluega paia a le Atua, faapea le paia o le afioaga ma le mamalu o le Ekalesia mo le lagolago malosi ua māmā ai le avega, o e na alolofa ma asia le galuega, a e maise le Matua o Faiva ma le Falefa o le Aiga Salemalama i le aao sosolo ua matagofie ai le maota tapua’i i le Atua.

O le afioga i le Taitaifono Fono Tele, susuga Iosefa Atapana Uilelea FT na saunoa, “*Mapu ane ia i Niafane ma lafo le taula i Malolo, auā ua a’e manuia lau faatamasoaliiga, ua to’a le atu sisi a le tautai. Ua fia atu ē foi le Ekalesia, ma se’i faailo lau lupe ua mua, e pei o le alaga a soāseu. Malo le galulue, le faatoatoa ma tautua i le Atua...*” Ona ia tau’a’ao lea le meaalofa \$20,000 a le Ekalesia faatasi ma moomooga alofa, ia manuia le Kerisimasi ma maua se Tausaga fou fiafia, i le faamanuia ma le alofa ta’ita’i malaga o le Atua.



---

## **FAAMANUIA A OLOMANU**

O le Aso Tofi 9 Tesema i le Maota Tupulaga EFKS na fai ai le Faamanuia ma Laugatogi a Olomanu - le nofoaga a le Malo i Mulifanua, mo faasalaga ma toe fuata'iina ai olaga o tupulaga talavou ua faamaonia soliga tulafono. O le nofoaga leni i Olomanu o loo faia pea i ai le misiona a le Ofisa Faamisionare a le Ofisa Tutotonu o le Ekalesia, o loo pulea e le Failautusi Aoa, i le vaaiiga a le Komiti Faamisionare. O le afioga Taitaifono Komiti Faamisionare, o le Taitaifono foi lea o le Fono Tele, susuga Iosefa Uilelea FT na ta'ita'i le sauniga. Na auai ma molimauina lea aso fiafia e le afioga Sui Taitaifono Tunumoso Iosia FT, le afioga i le Sui Komesina Matagaluega Leoleo, Falepuipei & Fuimu, Monalisa Papalii ma malu o le malo, o matua ma aiga o i latou o auga o aute. O le Failautusi Aoa o le Ekalesia, susuga Vavatau Taufao FS na saunoa i le lipoti o galuega o le tausaga, sa feagai ai ma le Ofisa Faamisionare.

O le tausaga 2014 na amata ai leni polokalame i Olomanu ua ta'ua o le Taea Toe Afua, e ala i le mafuta, faasoa ma faamafanafana i a'oa'oga faaTusi Paia, ia toe afua ai se taea fou mo i latou. Na fausia se falea'oga faapitoa ma siitia i le isi laasaga, ina ia lē gata i le faaleleia o le amio ma le ola faaleagaga, a e ia a'oa'oina nisi o tomai faapitoa fai faato'aga, faakamuta, ma nisi. O le faamoemoe maualuga pe afai e magalo i latou, ua i ai lea tomai ma le agavaa, e saili ai so latou lumana'i manuia ma tautua ai aiga ma le atunuu lautele. Sa amata le polokalame e faapito i le au talavou, a o le tausaga talu ai 2020 na amata ai ona aofia ai ma le au matutua e siitia mai Tanumalala. Ia silafia sa i ai nisi talavou mai leni polokalame i Olomanu, sa faa-faigaluega e le Ekalesia ina ua magalo mai - o Tavita Une i le Faa-Tekonolosi, ma Solomona Tini i le Fai-ea malūlū i le vaega Maota Mautotogi. O Solomona o loo aveane nei ma A'oa'o Tausaga Lua i le Kolisi Faafaifeau Malua, a o Tavita ua faamavae i lona finagalo malie.

E lua vaega sa vaevaeina i ai le polokalame e pei ona tauluga i lea aso le tolaulauina o faailoga - o le vaega Talavou ma le Vaega Matutua. Sa faai'u le aso i faafiafiaga matagofie, o le taumafataga fiafia ma faiga meaalofo, e pei ona sa tau'a'ao i ai le susuga Failautusi Aoa ma le Ofisa Faamisionare i palapala malo faapea foi la latou meaalofo tupe. Na faaleo foi le faafetai a le Malo e le afioga Sui Komesina, i le EFKS mo leni polokalame tāua, mo le faaolaina o agaga o alo ma fanau e maua i mailei a le fili.

---

## **FAAPAIA LE MAOTA** **“AFEGA O LE ALOFA”**

O le igoa lea o le Maota o le Galuega/Hall a le EFKS Afega na faapaia i le Aso Faraile 17 Tesema 2021. O le faletua o le afioga Taitaifono Fono Tele ia Teki Uilelea sa ia alalua le lipine e tatala aloaia ai lea galuega tele ma matagofie. O le susuga Fili Matalavea FT na ta'ita'i le sauniga e faapaia ai le galuega; o le Lauga na autū, “Atia’e i Luga o se Faavae Mautinoa” 1 Kori.10:1-13. O le tiakono ia Fata Paulo (Talalelei) Seuseu, le Failautusi o le Komiti Galuega na saunoa i le Tala o le Galuega. E \$500,000 le tupe faavae o le galuega, mai sailiga tupe masani a le Aulotu e \$150,000 + \$350,000 nogatupe mai le Samoa Commercial Bank. O le masina o Mati sa fai ai tauofoga mo le tuuina i lalo o le maota tuai, peitai na faia e matai ma le aualuma. O le konekarate a le Zheng Contractors na fausia le maota e 45mita x 15mita x 8mita i le 8 masina, o le tau atoa e \$956,700. E tele faaopoopoga ma fesuia'iga sa talosagaina e le Aulotu, a e faafetai i le agalelei o le Matuafoaiva ma le Aiga Salemalama, sa faia lava aunoa ma se isi tau faaopoopo. E tele foi nisi auunaga na ofo fua mai e aiga o le Ekalesia ma le afioga.

O le afioga Taitaifono Fono Tele susuga Iosefa A. Uilelea FT na saunoa fai ma sui o le EFKS Aoa e faafetai, faamalo ma faamanuia le Aulotu i Afega mo leni galuega tele. E moni le upu, ‘Ua ta fia Falealili fua’, a o afioga a le Atua, “*O e ua totōina i le fale o le Alii...*” Ona ia tauaao atu lea o le meaalofo \$10,000 a le Ekalesia Aoa. O le susuga Faafegaiga Luapene Nepo FS (faletua ia Faaolataga Popo Nepo) na saunoa e faafetaia le meaalofo, faapea le tapuaiga ma le lagolago a le Laulau Fono Tele ma le Ekalesia Aoa, a e maise le faamalumalu \$200,000 i la latou nogatupe. Na ia faafetaia foi aiga, lupe faalele ma taulaga soifua a Afega i lo latou sao, a o aitaumalele i tofi ma valaauina. Na ia molimau ua faaigoa ma faailoga faapitoa leni galuega, o ‘Afega o le Alofa’ o le fa’alo a auga tupulaga o aso nei e manatua ai tua’ā ua lagomau mai ti’asā, ona o latou faata’ita’iga lelei, ua fua mai nei i isi galuega tetele - ia i le Atua le viiga ma le faamanū, seanoa o Ia e lē tau lau o le faamoemoe. Sa faai'u le aso i fa'aaloaloga maualuluga e masani ai le EFKS i lana faaea i le Atua, e ala i Lana aufaigaluega paia, ma e ua tatau ai le fa'aaloalo.

---

## **FAAPAIA MAOTA FOU** **FEAGAIGA EFKS APIA**

E ui ina sa tetele uaga o le taeao o le Aso Toonai 18 Tesema, a e talitonu le EFKS Apia o uaga o faamanuiaga mai le Atua, mo le faapaia o le Maota fou o la latou Faafeagaiga. E ui lava foi ina sa feagai le afioga i le Taitaifono Fono Tele, susuga Iosefa Atapana Uilelea FT ma le faletua ia Teki, ma le tele o galuega i lena vaiaso - faapaia le malumalu EFKS Vaipu'a 16/12, faapaia Maota o le galuega EFKS Afega 17/12 - a e sa mafai ona faataunuu ma le manuia le faamoemoe o le EFKS Apia i lea taeao. Na ta'ita'iina le sauniga mamalu e le susuga Efu Efu FT, le Toeaina o le Pulega Apia Sisifo, a o molimau susuga i Toeaina o le Matagaluega Apia - Siolo Tauati KMTA ma Merita (Apia Sasa'e), Auva'a Peseta FT ma Aiga (Apia Saute), o nisi o faifeau o lupe faalele a le Ekalesia i Apia, ma le aufaigaluega a le Pulega. O le faletua o le Toeaina ia Hana Efu na lafo i ai le fa'aaloalo na te 'o'oti le lipine mo le tatalaina aloaia o le galuega, ona ulufale lea o le mamalu e maimoa ma molimauina le matagofie o le galuega.

O le afioga i le Taitaifono Fono Tele na saunoa fai ma sui o le Ekalesia Aoa e momoli le faamalo ma le faafetai i le susuga Apelu Jr. Lelevaga FS o loo tausia le galuega, faapea le afioga i le Sui o le Fono Sui Tofia, le susuga i le A'oa'o Fesoasoani Hon. Lemamea Tuiletufuga Ropati (Taitaifono a le Aulotu) ma le faletua, afioga i le Tiakono Toeaina, Laauli Talauta Laupepa TT ma le faletua, ma le mamalu o le EFKS Apia mo le galuega matagofie ma le matalelei ua latou gapatia ai. E faigofie ona iloa le laasaga o i ai le faatuatua, i galuega e tino mai. Malo le saili malo mo le Atua, ma le EFKS. Na ia faafetaia foi le afioga i le Matuaofaiva ma le Falefa o le Aiga Salemalama, le konekarate sa nafa ma le fausia o le maota. Ona ia tauaao lea o le meaaloa \$10,000 a le Ekalesia Aoa, molimoli faatasi ma faamanuiaga ia maua se Kerisimasi fiafia, a o faatali le oo mai o lo latou faifeau i le tausaga fou aulia i le alofa o le Atua. O le maota fou lenei ua fausia i le tulaga sa i ai le Maota o le galuega muamua a le EFKS Apia, e pei ona sa tuufaasolo mai ai ana feagaiga sa mua i malae - susuga Utufua FT & Taioaopo Naseri (penisione), Galuefa FS (maluu) & Tala Aseta, Faulalo FS & Lia'i Sagapolutele, ma isi. O le Tala o le Galuega na saunoa i ai le Teutupe a le Aulotu, afioga Le Mamea Peta Mualia Te'o, ma faai'u ai lea aso fiafia i le taumafataga ma fa'aaloaloga masani o aso faapenei.

---

## **OSIGA FEAGAIGA** **EFKS LALOMANU**

O le osiga feagaiga a le EFKS Lalomanu ma lo latou faifeau filifilia, susuga Vaai Tua FS ma le faletua ia Niukini, na faataunuuina i le taeao o le Aso Faraile 17 Tesema 2021. O le susuga Pati Vili FT, le Toeaina o le Pulega Aleipata, a o le faafeagaiga a le EFKS Saleaamua, na ta'ita'i le sauniga e osi ai le feagaiga i luma o le Atua. Sa le'i mafai ona auai le mamalu o le Laulau Fono Tele, a e maise le afioga Ta'ita'ifono ma le Faletua, o le KMTA o le Matagaluega LLA, ona sa lē ma'alofia lo latou tuatuaia i nisi faamoemoe o le Ekalesia i le taeao o lea lava aso. Ui i lea sa mafai ona auai ma molimauina e le Taitaifono Komiti Au Toeaina, susuga Asotasi Gu Time FT, Misipalauni Faatau FT le KMTA Faleata, le toatele o susuga Toeaina, Faifeau ma Faletua, ae maise le Failautusi o le Matagaluega, susuga Faasalafa Alaovae FS ma le toatele o uo ma paaga i le Tala Lelei a Vaai ma Niukini. Sa faapea foi ona molimauina e le afioga i le Sui o le Fono Sui Tofia ma le faletua, ma le mamalu o aiga na lua.

O le afioga i le Tuiatua Faanofonofu, le matua ia Fuataga Faasi'i na saunoa e fai ma sui o le Ekalesia, e tusa o la latou filifilia na faia i le ala masani o le palota, e ala mai ai le faasinoga a le Agaga o le Alii, ma faia ai tofiga mo Lana au faigaluega i lea tupulaga ma lea tupulaga. Sa tali fuaitau foi ma ta'utino le susuga Vaai i le loto faafetai i le Atua, ma le Ekalesia i Lalomanu mo la latou faatofalaiga. O le faamoemoe lenei e tasi na ofoina ai le ola, ia avea ma auuina o le Upu ma le Sakarameta, e ala i le tofi faifeau tausii nuu. O le susuga Vaituu Palale FS (EFKS Satitua) na saunia le Lauga e faala'ei'auina ai le faifeau ma lona faletua, tainane foi le Ekalesia ma le afoaga e tusa ma la latou pito laau i le galuega fai faatasi mo so latou manuia ma le faateleina o le viiga o le Atua e ana le galuega. Na taualuga le sauniga i le Sakarameta paia o le Faamanatuga, na ta'ita'iina e le susuga i le Faafeagaiga e tusa o le faasinoga a le Tusi Fai Lotu a le Ekalesia, "Ia Viia lou Suafa".

O le susuga Vaai Tua FS ua 39 tausaga o le soifua, na i'u mai Malua i le tausaga 2015, ona galue lea i le Ofisa Tutotonu o le Ekalesia i le vaega Faamisionare i le tausaga 2017. O le tausaga 2019 na faau'uina ai i le tofi Faifeau Samoa le faifeau ma lona faletua, o lupe faalele a Matautu, Gagaifolevao, Faleseela Lefaga, Afega ma Fagalii. Ia manuia le galuega.

---

# O LE PEROFETA MULIMULI

(O le tala faa-fagogo ua faa-Samoaina mai le tusi, *The Last Oracle*, tusia e James Rollins)

O Sio Koualasaki, se tasi sa galue muamua o se aliivaa i le fuā manua, na la'ei i ofu taalo ma ofu faasamasamanoa. Sa faalēfetaui i le vaai. O lona lauulu sa sele pupu'u, totoe ai na o se tagutugutu uliuli ma lona isu patupatu, na foliga ai o ia pei o se kolila ua tafi, ua faamalosia i totonu o se peleue maanuminumi.

Sa punou ifo i lalo Koualasaki ma fa'aaogā le pito o lona ofu taalo e soloi ai ona seevae. “E tolu selau talā na faatau ai o'u se'evae nei. O le ituaiga Tiuka e su'i ma faaulufale mai Egelani. Sa oka faapitoa mai e faatatau i lo'u lapo'a.”

Na faamomoe teisi laumata o Karai, ona tepa a'e lea mai lana masini. Na iloa e Koualasaki e pei lava ua tele ana tala ua masua atu. Ua liua ona foliga pei se mamoe. “Ua lelei. Ou te fiafia tele i seevae. E ā la? Sa i ai le fuafuaga mo se tafaoga ma la'u manamea, a e...sa ia toe tolopō mai.”

O se tamaitai ua atamai.

“Talofa e, faamalie atu,” na leotele atu ai Karai.

“O le mea sili e lē o mā'osi'osia.” O Koualasaki lea.

“O le uiga o la'u tala, faamalie atu ua lē oo le lua evaga.”

“Oi, ioe.” Na ia faamimigi ai. “Ua misia e ia.”

E le'i toe ma'imauiina le taimi e finau ai Karai. Na ia liliu ane i le masini o loo u'u i lona lima ma feliuliua'i faataamilo mālie. O sina sitepu i le itu taumatau, na ia maua ai le manogi faailo o le faa-leitiō. Na pi'o ese mai le ala savali ma aga'i atu i le mutia o le maota talaloa. “Le itu lea.”

O le auala tata'i a le polofesa na ta'ita'iina ai i la'ua nei e ui atu i le Togalaau o Faatagata i le Maota, fesaga'i ma le Fale Mataaga o Isioni. Na mulimuli atu Karai i laasaga o Poleki i totonu o se fanua lafulemu malutia ua magoto, ma toe ulufafo atu. I tua atu o le togalaau, sa fa'aaui ai le auala o Poleki e kolosi atu i le Maota talaloa, faavāvā atu i autafa o fale'ie o se ofisa faasalalau o le Aso o Leipa e le'i talaina lava i lalo.

Sa tepa atu i tua Karai i le togālaau māgoto, a o ia iloilo le auala na ui ai le polōfesa. “Sa ia taumafai e 'alofia le iloa atu o ia e tagata.”

“Ia pe atonu foi sa vevela le tamaloa,” sa fai atu ai Koualasaki, ma solo le afu o lona muāulu.

Na saili solo Karai i autafa. I le itu i sisifo, o faasaga atu ai le Maa Faamanatu Uosigitonu i le la susulu

malosi; i sasa'e o loo mānu a'e ai le Maota o le Laumua o Amerika.

O loo mana'omia tele e Karai ni tali, ma ia fa'aaui ai. O fuanimera faitauina i luga o le mita o lana masini ua faasolo ina vaivai ma mou atu, a o ia kolosia le Molo. Na ia maitauina i ana sitepu taitasi, le tātā mālie ifo i lalo o milirema o le vevela o faauila. Ina ua ia taunuu i le tupito o le Molo, sa kolosi faanatinati atu ai loa Karai i le Auala o Matisone. Na ia toe maua le ta'iala a o ia ulu atu i se isi paka. Sa faateteleina le faailoilo a o ia latalata atu i se paolo o faaputuga laau totō o fugalaau fai teu. O i ai se nofoa sa taatia ai i tala ane o se pupu aute e gata i tuli le maualuga.

Na la'a atu Karai i le nofoa.

I lea nofoaga faaesea, na toe osooso malosi a'e ai i luga le tātā o milirema.

Pe mata sa faatali iinei Poleka? O le mafuaaga lea o le malosi o le vevela faauila o faailo mai ai le ta'iala? Sa tulei ese e Karai se lālā o le pupu aute ma ia iloa atu ai se vaaiga lautele o le Molo faasolo atu i lumā, atoa ai ma se vaaiga atoa o le Olo o Simifisone. Pe sa faatalitali iinei le polōfesa se'ia oo ina mautinoa ua saogalemu? Na tau pulapula a'e Karai faasaga i le aasa o le la. Na ia manatua le su'esu'ega a Malakoma, le faavaivaiga, le maumau. O Poleki sa i ai i ona toe laasaga. Atonu o le atuatuvaale na ia faamutaina o ia. Aisea?

Na amata ona la'a ese Karai a e taletale loa Koualasaki e tau kilia lona fa'a'i. Sa tootuli o ia i le tasi vae, o tafitafi lona seevae, a o le isi ona lima sa aapa atu i lalo o le nofoa. “Se'i taga'i mai,” na ia fai ane ai ma tu i luga. Na faliu ane, o 'u'u mai se tama'i mea-vā'ai.

Na faasaga atu e Karai le masini faailoilo latalata i le mea-vā'ai. Na oso i luga le faitauga. “O loo vevela.” Na faanunumi foliga o Koualasaki ma ia aapa e tuu ese atu le mea-vaai. “Tago mai, avatu le mea lea.” Na tago atu Karai aumai le mea-vaai. E leai se faavae o le matafefe ma pala'ai o lana paaga. E ui ina sa i ai le uila, a e le'i tulaga ese sona malosi mai le mea e masani ai.

Sa fāliu Karai, si'i a'e i luga le mea vaai ma autilo atu ai agai i le Olo. Na aliali faa-lapopo'a mai i ona luma foliga atoa o le maota. Na ia iloa atu se tagata o savali ane ai i ona luma. Na ia maitauina lelei foliga o le tagata e ala i le mea vaai. Sa manatua e Karai le



faatotope atu o Poleki ia te ia ina ua la'ua felāta'i. Sa faate'a ese e Karai lona manatu ua na o se faanatinati a se tagata aisi mo sina meaalofa. Ua ia masalosalo nei sa maitauina o ia e Poleki. Atonu e lē na o se atuatuvaale sa tosoina atu o ia i fafo. Faamata sa iloa atu o ia e Poleki o ia savali i luma o le Molo, ona sau ai lea e faafetaui ia te ia mai le mea na lafi ai? Na faapa'ū ifo e Karai le mea vaai i totonu o le tama'i ato sa tautau i lona puimanava.

“Ta o.” Na la'ua o ese i fafo mai le faaputuga itiiti o laau, ona mulimuli atu lea o Karai i le ala i sisifo i luga o le Auala o Matisone, i se seti o fasitepu. Na liliu ane le taiala ia i la'ua.

Na ea a'e i luga le ulu o Karai ma faasaga tonu i le faitoto'a o le Molo e ulufale atu i se tasi o fale mataaga ta'uta'ua o Simifisone: le Fale Mataaga o Tala Faasolopito Faanatura. Na teu ai le anoano o meafaitino mai itu e fia o le lalolagi – faalesi'osi'omaga, faale-laufanua, faale-tala faasolopito – e fefiloi amata mai nai ponaivi ma ulupoo laiti e oo i tino atoatoa o manu mata'utia le laulauā.

Sa fālō i luga e Karai lona ua. Na aliali a'e le tualuga lapotopoto o le fale mataaga, i luga a'e o le polotito tafatolu o loo lagolagoina e ni pou Korinito se ono. O lona faataupupula a'e i luga, na faate'ia ai o ia i le foliga tutusa lelei o le fausaga o le fale mataaga, e pei o le malumalu Eleni i le tupe siliva a le polofesa. Pe mata e i ai se fesootaiga?

A e na te le'i mulimuli atu i le ta'iala i totonu, na ia iloa e tataua ona ia lipoti i le ofisa faatonu tutotonu. Na ia sitepu ese i le isi itu, ma faalagolago atu i puipui o le sitepu, ma ki lana leitiō uaealesi. Na ia maua vave atu Faatonu Koloue.

“Ua i ai se mea ua e maua?” na fesili mai ai Penita. Sa taumafai Karai e musumusua lona leo. “E foliga mai e oo atu le taiala o le mea na i ai le polofesa i totonu o le fale mataaga o tala faasolopito o Simifisone.”

“Le fale mataaga...?”

“O lea o le a fa'auau la'u sailiga i totonu. Ae sa i ai se fesoota'iga o le polofesa ma lenei nofoaga?”

“Ou te lē iloa. Ae o le a siaki i paaga tuai.”

Na manatua e Karai se vaega o le talanoaga talu ai e uiga i le olaga ua te'a o Foma'i Poleka. “Lau afioga i le Faatonu Koloue, e i ai le isi mea. E te le'i faamalamalamaina mai lava se tasi o mataupu.”

“O le a lena, lau susuga i le Taitai?”

“Sa e fai mai o le polofesa na ia faavaeina le Vaega'au o le Sikima. O le ā le uiga o lau tala?”

Sa toso loloa le leai o se pisa, ona fa'auau atu lea o Penita. “Karai, o le ā sou iloa i le faalapotopotoga e ta'u o le Iasoni?”

Na faate'ia Karai i le ese o lenei fesili, na te le'i mafai ona faafesoota'i. “Lau afioga?”

O le au Iasoni o se tanetau o mafaufau faasaienisi na fausia i taimi o le Tau Mālūlū. Sa aofia ai ta'ita'i mai ituaiga matātā eseese, o i latou na manumalo ma maua le Faailoga o le Nopela. Sa latou faatasitasi ma faia fautuaga i vaega a le militeri e faatatau i poloketi faatekonolosi.”

“Ma o Polofesa Poleki o se tasi o sui?”

“Ioe. I le faasolo mai i le tele o tausaga, na iloga le tula'i mai ma le taua o le Iasoni i le militeri. Sa latou fonu i tau mafanafana taitasi ma fausia auala fou o metotia. Ma e tali atu ai i lau fesili, o se tasi o nei fonotaga, na fautuaina ai e Polofesa Poleki le fautuina o se vaega faamiliteri o tagata su'esu'e latou te tautuaina le TARAPA, e galulue mai tua i nofoaga o taua mo le vaega'au.”

“Ma fanau mai ai loa Sikima.”

“Lena tonu lava. Peitai ou te lē o mautinoa o i ai se tāua o lenei mea e fesoota'i ma le fasiotiga tagata. E tusa ma tala ua ou maua e oo mai nei, e le'i toe i ai se aafiaga o Poleki ma le Iasoni mo ni tausaga se tele.”

Sa faataupupula a'e Karai i le pito i luma o le maota Eleni maualuga. “Atonu sa i ai sana uo Iasoni sa galue iinei i le fale mataaga? Atonu o le ala lena na sau ai o ia?”

“O se manatu lelei lena mo se su'esu'ega. O le a ou vaai i ai, a e masalo e umi se taimi faato'a maua mai se tali. I tausaga ia ua tuana'i atu, sa faasolo lava ina faalilolilo la latou faalapotopotoga. Sa fevaevae'i ona o ni mataupu faalilolilo e sili ona ogaoga, ma ua tula'i mai ai ua lē silafia e isi Iasoni mataupu o loo fai e isi Iasoni i nei aso. A e o le a fai ma ou valaau i ai.”

“A e o le a ou mulimulita'i pea a'u i le ta'iala lenei.” Na ia faauma le la'ua talanoaga, tapē lana uaealesi ma talotalo atu ia Koualasaki. “Sau iinei. O le a ta'ua o i totonu.”

“Se ua leva ona tataua ona ta o ese mai lenei la ua matuā vevela.”

E le'i finau atu Karai. Na laa atu i totonu o le faitoto'a, fiafia i le 'ea malulu o totonu o le fale malu'ia i ataata. Sa tatala saoloto le fale mataaga i tagata lautele, peita'i sa faalālā atu e Karai lana pine faailo i le leoleo sa tiute i le faailoilo u'amea.

Sa faasino atu o ia e alu.

A o ia faavāvā atu i totonu o le potu autū lapotopoto, na segia le maui o Karai i le tulaga ese o le telē o le avanoa i totonu. O le fale faalapotopoto e tafa-valu lona foliga ma sa siitia a'e e fogafale tolu, o fogafale taitasi e faatū i luga o isi pou e tele, seia tau atu i le tualuga lapotopoto maoa'e e fola i maa Kuasavino. Na susulu a'e ave o le la i faamalama o loo i puipui mauuluga o le maota ma se faamalama lapotopoto tele e ogatotonu ai.

I le pito mai, i le ogatotonu o le potu lapotopoto autū, sa tu ai se tasi o manu faailo a le fale mataaga, o se elefane po'a e valu tane le mamafa. Sa tu faasaga i luga lona tino ma ona nifo pipi'o i totonu o se fanua o mutia mamago. Na ui atu le auala o Poleki taamilo i le elefane ma aga'i atu ai i fasitepu mo tagata lautele.

A o mulimuli atu Karai i le ta'iala, na ia maitauina se fu'a o tautau mauuluga mai i le puipui i le itu agavale. Sa faasalalau mai ai se fa'aaliga o le a faia i le masina o i luma. O loo tusia ai le ata o le ulu o Metusa, o lona lauulu felefele solo i gata femigoia'i, o loo atagia i se talitā lapotopoto. A o ia pulato'a a'e i luga, sa faatelegese teisi le savali a Karai.

Sa ia manatua le ata o le tupe siliva uiga ese a Poleki, a o ia faitauina le igoa o le fa'aaliga o le a faia, ma lagona ai o loo sa'o le itu o aga'i i ai lana su'esu'ega: O MISITERIO LEILOLOA O TALATU'U FAA- ELENI.

### 6.32 afiafi

I totonu o le potu pogisā, sa pulato'a atu ai alii e toalua i le tioata itutasi aga'i i totonu o se potu ta'alo a se tamaitiiti. Sa la'ua nonofo i nofoa faamalū, a o la tua atu o i ai le faasologa o nofoa e fa mo le potu fono, e leai se isi ua nofoia.

O se fonotaga faatuma'oti lenei.

O tua atu o le fā'ata tioata, sa sosoo atu ai ma se potu e malamalama atoa. O ona puipui sa vali pa'epa'e, ma sina lanu moana o le lagi itiiti, o se lanu e tusa ma faamaumauga faa-saikolosi, e fuafua na te faamalosi'au mo se tulaga o mafaufauga loloto filemu. Sa i ai se sofa moega ma ni ona aluga e faafuagalaau, o se pusa mea taalo o matala, ma se laulau a tamaiti. Sa nofo sa'o i luga le tamaloa aupito matua o i la'ua. Sa i ona autafa se tama'i 'ato ma'osi'osia, sa i ai se fana e fa'ata alu mamao o le ituaiga Taragunova e le'i faapipi'ia.

O le isi tamaloa e limasefulu fitu tausaga le matua, e luasefulu tausaga e laititi ai nai lo lana paaga Rusia. Sa 'ofu sona suti fufusi. O lana vaai sa taula'i i le

teineitiiti a o ia tu i luma o le faatulaga uga ma sagole solo le ipu mafolafola o i ai peni maka-mea. Ua alu le 'afa itula o ia tusia se tafafā lanu meamata i luga o pepa papa'e sa faapipi'i i le faatulaga. Sa ia tusi faataamilomilo ai le peni i se mamananu faasolo.

"Raeva ea," na fai atu ai le tamaloa, "Ou te lē fia faalavelave so'o atu, ae ua e mautinoa e le'i taofia e Poleki le mea ia te ia?"

Na mapuea Foma'i Iuri Raeva. "Ua alu lo'u olaga atoa i lenei poloketi." Faatasi ma lo'u agaga, na ia faaopoopo lemu atu ai. "Ou te lē mana'o e faaleaga a o lea ua tau lalata i ai."

"O fea la o loo i ai? Sa ta'ua matuā su'e faatapito le fale talimalo taugofie sa ia nofo ai anapō. E leai se mea. O le a tele ni fesili e lagalaga pe afai e 'emo ane ua i lima o tagata lē alolofa."

Na vaai atu Iuri i le tamaloa o loo i le nofoa tuaoi. O Ioane Mapoletope, o se ta'ita'i o vaega mo le Vaega'au Faatonutonu mo Puipuiga, o ona foliga uumi ma se auvae e tautau pei ni taga i lalo o ona mata, e peisea'i e gaosia i ga'o o lamepa ma ua leva ona faataatia i le la. E oo i le vali na u'u ai lona lauulu ua pogisa tele, e manino mai le faatauvaa mo le matua ua oo i ai. E lē faapea ua i ai se aiā a Iuri e faitio ai i se tagata o taumafai e 'alofia le tai o le soifuaga. I lalo ifo o lona lava pa'u, o loo tumau le lelei o lona tino, o loo ma'ati pea lana pupula, ma lona mafaufau o loo vave pea. I le va o ona tui e fai i Vailaau e faatupu ai ona hormone, faatasi ma lana koleni faamalositino, sa ia taumafai malosi e pei o isi tagata e taofi mai le faasolo ina matua. Ae lē o le faatauvaa na tuleia o ia.

Na ia pulato'a atu i totonu o le potu.

E leai, e lē o le faatauvaa.

Na tātā faatagipalau tamatama'ilima o Mapeletope i lima o lona nofoa. "E tatau ona tatou toe maua mai le mea na gaosia e Poleka."

"E le'i i ai ia te ia," na faamautinoa faamalosi atu ai Iuri ia Mapeletope. "E telē tele e lē mafai ona lilo i lona tino, e oo lava i lalo ifo o se peleue. Sa mafai ona ou taofia o ia. Ae le'i talanoa o ia i se isi tagata." "Talosia e sa'o lau tala. Mo lo tatou manuia uma." Na toe faasaga atu le vaai a Mapeletope i le potu. "Ae sa mafai e le tamaitai ona mulimulita'i ia te ia? Mai lava i Rusia."

Na luelue le ulu o Iuri. O le mitamita faatamā na lagona i lona leo. "I le faatasi mai ai o ia ma lona tuagane masaga, atonu lava o le a i'u ina tatou sosofaina le pa puipui."

*(fa'aauau i le Sulu Samoa, Ianuari 2022)*

---

## **OSIGA FEAGAIGA** **EFKS SOGI**

O le Aso Lulu, 22 Tesema 2021 i le Malumalu Tolorosa i Fugalei, na osia ai le feagaiga a le EFKS Sogi ma lo latou faifeau susuga Laupama Tokan Solomona FS ma le faletua ia Vaitoomuli Fuamanu Alaovae Solomona. O le susuga Efu Efu FT, le Toeaina o le Pulega Apia Sisifo na ta'ita'i le sauniga ma osi le feagaiga. O susuga Komisi Samuelu FS (EFKS Fugalei) na saunia talosaga, a o Faatafa Nefu FS (EFKS Alamagoto) na saunia le lauga. O le afioga i le tiakono ia Itutu Toetu Ioane na fai ma sui o le Ekalesia e molimau i la latou filifiliga sa fai, na i'u ane ai i le susuga Laupama ma Vaitoomuli. Na tapunia le ulua'i EFKS Sogi ona o fuafuaga a le Malo, ona siitia lea o le toatele i Falelauniu i o latou fanua na faafesua'i, ma faatuina ai le Aulotu fou EFKS Falelauniu. Peitai o nisi sa pele pea i o latou loto tapua'i le nofoaga i Sogi, ma faatuina ai le isi Aulotu fou lenei ma ta'ua pea o le EFKS Sogi, i totonu o Fugalei (tua mai o le EFKS Ketesemane fou). Na tofia le susuga Laupama ma le Faletua la te tausia le Aulotu i le tulaga faa-misionare, a o lolotu i la'ua i le EFKS Falelauniu. Ma o le mae'a ai o le tolu tausaga faamisionare, na fautuaina ai loa le Aulotu ina ia saili sa latou faifeau latou te osi feagaiga e tusa o aiaiga faa-Aulotu misionare. Na amata le Aulotu i Matafale e lima, a o lenei ua sefulu-tasi, ma sa autasi uma ina ia avefa loa le misionare ma lona faletua, mo latou faifeau tausi nuu e pei ona faatino i lenei aso.

Sa tali fuaitau foi le susuga Laupama i le agaga faafetai, e autu i le 'alofa tunoa' mo le fa'aaogaina o lo la'ua soifua mo le galuega paia. Sa fai lava le galuega ma faatalitali o le a le finagalo o le Atua e ala i le faatofalaiga a le Aulotu, o lena foi e usita'i i ai. O le a faapea foi ona fa'aaau le galulue fiafia faatasi ma si a la'ua Aulotu e tautua le Ekalesia Faapotopotoga Kerisiano Samoa, mo le mamalu ma le viiga o le suafa o Iesu Keriso.

O se sauniga mamalu ma le fiafia na molimauina e le afioga Taitaifono Komiti Au Toeaina, susuga Asotasi Gu Time FT, susuga Toeaina ma Faifeau o le Pulega/Matagaluega, o matua penisione (Alaovae FT & Elisapeta, Utufua FT & Taioaopo Naseri, Kerisiano FT & Laumata Soti), susuga Pule o Malua, o uo ma paaga i le Tala Lelei, a e maise o aiga na lua. Na taualuga i le Sakarameta o le Faamanatuga, ma sa folasia foi le 'le o le Feagaiga na saunia e le Aulotu, ma faai'u ai i a latou pelega o feagaiga ua osia.

---

## **FAAPAIA MAOTA FOU** **FAIFEAU EFKS AUALA**

O le EFKS Auala o loo faa-fale-lēmalu ai le susuga Motusaga Lesa FS ma le faletua ia Tanya, talu mai Iuni 2020 (na i'u mai Malua i le 2015). O le susuga i le Toeaina o le Pulega Itu Asau, le KMTA o le Matagaluega Itu o Tane, susuga Amuia Seuala FT na ta'ita'i le sauniga mamalu e faapaia ai le galuega fou ma le matagofie, o le maota o le faafeagaiga. Na ia fa'aaogaina le Tusi faitau o lea aso, 2 Kori.9:6-15, ma lona manatu autu, 'Taalala e Fo'ia ai Tulaga Lamatia' e auala mai ai le Upu faamafanafana, faamalo ma faamanuia i le au faatuatua i Auala e tusa o lo latou gapatia. A o le faletua ia Susana Tunumoso Soliola Iosia na ia alalua le lipine e tatala aloaia ai le maota fou o le faafeagaiga ma lona aiga. E tusa ma molimau, na faama'ite fautuaga mai le Tiakono Toeaina i ana asiasiga o le Faamati, ina ia toe silasila i le tulaga va-apiapi o potu mālōlō ma le ofisa o le faifeau. Sa faaosofia e le Agaga le Mafutaga Tina e laga le galuega, ma e ui ina sa le'i talia gofie e le itupa o tamā, a e sa faapea loa ona amata taupulega, ina ia faaleleia ma faatetele na o potu. O le afioga ia Taito Tapale TK, o se itutino o le Ekalesia ma le afioga, e ana le konekarate ua ofo atu e faia le galuega. Na talia ma le faafetai lenei faamāmā avega, ma sa talia foi lana tuualalo mo le fausia o se maota fou atoatoa, nai lo le faaleleia na o se vaega. Sa i ai le \$26,000 a le Aulotu, fai foi le Toomaga \$50,000 ma Tausala e \$23,000, faaopoopo i sailiga tupe i auala masani a le Autalavou, Aoga Aso Sa, Aufaipese ma le Mafutaga Tina. Faatasi ai ma le tele o isi tauofoga a aiga o le Aulotu, sa mafai ona faatino loa e le Matuaofaiva ma le Aiga Salemalama le galuega i le 5 vaiaso i lona tau e \$120,000.

Talu ai ona sa tuatuagia le Taitaifono Fono Tele, o le afioga Sui Taitaifono, Tunumoso Soliola Iosia FT, na fai ma sui o le Laulau ma le Ekalesia Aoa o momoli le faafetai, faamalo ma le faamanuia i le susuga Faafeagaiga ma le Faletua ma le Ekalesia mo le tautua osi taulaga i le Atua e ala i lenei galuega tele. E leai se iota o lo latou taulaga e lilo pe māmā i le silafaga a le Atua, Le na te tauia ma faatumu i ana lava auala mamana. Ona ia tauaao lea o le meaalofa \$10,000 a le Ekalesia, faatasi ma faamanuiaga ia aulia manuia ma malaga i le Tausaga Fou ma le olioli mai le Atua.

---

## SAUNOAGA FAAMANUIA O LE TAUSAGA FOU 2022

---

*O lea ua tu mālō le mauga tula, na tafu'i e Falefa o Sula, ina ua lagona le pa'ō o taulua vai a Utusami, e pei o le sāvali a Sa Tuala i le afu. Ua tatou talanoa foi a ua i alo, e pei o le vii o Lealaisalanoa. Ma ua ono ai i o tatou laugutu ona faapea ane: Sula ua afi, Sula ua teu, Sula ua maua; Sula ia ina sulā, Le sini o le 'anoalofa.*

*"O le aso lenei ua faia e le Alii, ia tatou olioli ma fiafia i ai."*

*O le a fata pea ia i Mauga o Ao, ou paia Samoa, auā o fatifati lava o Alao e totō i Ulutea; o le tala matāso'o foi, e lē soona tafo'eina. O ou paia faale-atunuu, i Aiga ma a latou Tama, o Tama foi ma o latou Aiga, Le usoga a Tumua ma Pule, Ituau ma Alataua, Aiga i le Tai ma le Vaa o Fonoti. Tulouna lava.*

*O ou paia faale-malo. I le e'eta'i o lau afioga i le Ao mamalu o le Malo ma lau Masiofo. Afio lau afioga a le Sui o le Fono a Sui Tofia ma lou Faletua. Afio lau afioga le Tamaitai Palemia ma le Kapeneta. Afio lau afioga i le Fofoga Fetalai ma le Palemene. Afio lau afioga i le Faamasino Sili ma le Ofisa o Faamasinoga. O Ofisa Sili ma le au faigaluega, i le nofo a Matagaluega a le Malo, o Faalapotopotoga Tumaoti, o Atina'e ma le Au Fai Pisinisi. Afifio foi Sui o Malo, Konesula ma Amapasa o Malo o le lalolagi, o a tatou pa'aga. Tulou lo outou paia.*

*E lē vaea le fala 'o'oto; i ou paia faale-Tala Lelei. Le afifio o le Laulau, ma le Fono Ekalesia So'o Faatasi. O Faauluuluga i Peresetene, Taitaifono ma Fa'a-ao, ma Ekalesia Kerisiano uma i Samoa. Tulou lo outou mamalu.*

*O outou paia ua ta'oto a o se ala o'o, o le i'a iviivia, e leai lava se tasi na te toe tau āutalaina. E nu'unu'u atu faatini o tausala ou paia faalupe, i le au fue loloa ma le au tootoo uli, o faleupolu ma le au failauga totofī, o la latou fatuaiga tausi lea.*

*I le suafa mamalu o Iesu Keriso, le Ao o le Ekalesia, o le Atua o faavae ai lou Malo Samoa. Ou te faatalofa ma faafeiloa'i atu ai, i tulaga o e'e, le agaga o le āva ma le migao e tatau ai. Tulou lau faafofoga maimoa mai.*

*Ae avea lenei avanoa, ma lenei auala o faasalalauga, ou te faafeiloa'i, e momoli le faamālō, le faafetai ma le faamanuia, i le Ekalesia pele i le loto, le Ekalesia Faapotopotoga Kerisiano Samoa. I Aulotu, Pulega ma le nofo a Matagaluega e fia, i Amerika, Hawaii, Ausetalia ma Niu Sila, o Ekalesia i Fiti ma Amerika Samoa, faapea i Samoa nei.*

*Susū lau susuga i le Sui Taitaifono o le Fono Tele. Lau susuga i le Failautusi Aoao, ma lau susuga i le Teutupe. Faafetai tele i lo outou lagolago, faufautua ma tausoa la tatou avega, i le Laulau a Fono a le Ekalesia. Lau afioga i le Taitaifono ma le Failautusi, ma le Komiti mamalu a le Au Toeaina, o Tamā o le Ekalesia ma outou Faletua. O tatou Tamā ma Tinā Penisione, o e ua a'e manumalo la latou faatautaiga. E faapea foi i le Nofo a Komiti, i le paia o Laulau a Komiti ma ona sui usufono uma. Le aufaigaluega totofī o Faafeagaiga Taulagi a Aulotu, nuu ma afioaga, o Faifeau ma A'oa'o Fesoasoani, afioga i Tiakono o poutū-toa o le galuega a le Atua, ma le loaloa o le Ekalesia, e oo lava i ana tupulaga ma fanau lalovaoa.*

*Ua faamalo le folau, malo le tauasa. Ua tuana'i atu le ala umi o lena tausaga 2021, sa tatou malaga mai ai i le vao, e pei o le nuu o le Atua anamuā. O se faiga malaga tumu i faamanuiaga, tumu i faigata ma lu'itau, e saga fausia ai lo tatou faatuatua. Na tatou ui mai i le Sami 'Ula'ula, a o tuliloa mai itu'au a le fili; na a'e Mauga o Sinai, na ifo Vanu o Akori; na fetai'a'i ma Pa o Ieriko, na si'i tau mai Amaleka, o sã Amorī ma sã Perisē.*

*A o lenei, ua laasia le Ioritana, ua tatou tuvae*

---

*i Kanana. Ua tuta i manuia lo tatou sa folau. A e faapefea ona tatou taunuu saogalemu mai? O la le Fai Salamo, “Ana lē seanoa le Alii na ia te i tatou, ana lē seanoa le Alii.” Ioe, e lē o se faautauta iina, po o se mataala iinei, e leai lava. O ‘a’ao ta’ita’i malaga o lo tatou Atua. O le Ao ma le Afi faaniutū, sa ta’imua ma mulimuli, sa lotolotoi ma faatonu folau i lau folauga. “Aua la ne’i ia te i tatou, ‘aua lava ne’i ia te i tatou, a ia tuuina atu le viiga i le Atua, ona o Lona alofa ma Lona faamaoni.” O taavili ma taamilo lo tatou lalolagi i suiga tetele, ma ona aafiaga. O faama’i mata’utia, ua fano ai le faitau miliona, a’afia le tamaoaiga, afaina soo se vaega o le soifuaga masani. O tagata faatupu faalavelave, o suiga ogaoga o le tau, ma loulouā o le natura, o tagata sulufa’i solo ona o taua ma le faailoga lanu. O nisi ia o le tele o faafitauli faava-o-malo, o feagai ma le tele o atunuu, ua oo mai lava i o tatou tua’oi.*

*E ui ina afaina nisi o tatou itutino, peita’i lo tatou lava lotoifale, e maofa lava le loto, i le malu puipua o lo outou soifua, ua lavea’i e le Atua lo tatou ola. “Le Atua e, o ai le tagata ua e manatu mai i ai?” Faafetai tele i lou alofa. Ave la’ia le mua ma le faasāō, i lo tatou Matai Sili. Ia tatou alalaga fiafia i le Alii, ma ia tumau le viiga i Lona lava suafa e faavavau. Le Ekalesia e, ua faamālō, faafetai i lo outou soifua faatuatua i le Atua, ma le maua’a o ou talitonuga faa-EFKS, na faavae mai e o tatou tua’ā. Mālō le faamalolosi i tapua’iga, ma le fai taulaga i le Atua i soo se auala, e tautuaina ai Iesu Keriso lo tatou Alii Faaola e Toatasi, le Ao o le Ekalesia.*

*Mālō le molimau, le tauiologolo ma folafola le Tala Lelei, auā le fafagaina o agaga. Faamālō le tatalo i le ao ma le po, e nōnō manū i le Atua mo se manuia o le atunuu, le lalolagi ma le Ekalesia. O le upu moni, o au tatalo sa faia ma le faatuatua, na faagaioi ai ‘a’ao o le Atua, e fai le mea e finagalo ai o Ia, se’ia aulia mai lenei tausaga fou.*

*Faafetai le fai taulaga i lenei tausaga. E ui lava ina tele faafatiamata’i o le soifuaga, a e ua e lē ‘alo i le ata o le laau. Ua e faamuamua le Atua, i Lana galuega ma Lana au faigaluega, faapea lou tua’oi, a e mulia’i lou aiga ma lau fanau. O loo faagasolo pea atina’e mana’omia e Aulotu - o malumalu tapua’i, maota o galuega, maota o faafeagaiga, ma isi. Malo le faamaoni i mea iti, ma le onosa’i i galuega tetele. Ua faamauina le siitia pea o lou ma’au, i au faiga taulaga i lenei foia tausaga. Faafetai le saili malo mo le Atua. Malo le faaea i le Ekalesia a Keriso. O le upu moni, e leai lava se matāua o lou afu sisina, e lilo i le silafaga ati a le Alii. Ia faamanuia ma toe faatutumu atu e le Atua, lou ma’au ma lou masui, i lau taulaga ua osi. Malo le onosa’i, i lu’itau ma tofotofoga o lenei tausaga. E moni lava le aposetolo, “O le tofotofoina o le faatuatua, e pei o le auro i le afi, e i’u ai i le manuia, le mamalu ma le viiga o le Atua.” Ua e manumalo a’ia’i i tofotofoga ma lu’itau, ona sa e tulimata’i pea le Satauro o Keriso, e pei ona sa taula’i le vaai a le ‘au Makoi i le Fetu o le Kerisimasi. Malo le faatoatoa, malo le tauata’i.*

*A o le upu moni, e leai lava se faiva e ‘asa ma se maumau. O a ni o tatou vaivaiga, sa lapelapea ai la tatou auaunaga i le Atua i lenei tausaga, ia alofa le Atua, e tusa ma le mutimutivale o Lona alofa, faamagalalo ma faamamā i tatou uma.*

*Fai ma sui o le Laulau a le Fono Tele, e momoli atu faamanuiaga o le Tausaga Fou, i le paia ma le mamalu tele o le Ekalesia Faapotopotoga Kerisiano Samoa, i Samoa nei, ma atunuu e mamao. Ia i ai le tamao’aiga o le Atua i ou pa, o ou fanua ma ou ‘a’ai. Ia i ai le manuia o le Alii i ou maota ma ou laoa. Ia pule foi le filemu o Keriso i o outou loto, mafaufau ma agaga.*

*Ia manuia tele le Tausaga Fou. Soifua.*

*(O le Saunoaga Faamanuia a le Taitaifono o le Fono Tele, susuga Iosefa Atapana Uilelea FT, sa faasalalauina i luga o le EFKSTV).*

---

# O I LATOU UA FAI I LAGI FOLAUGA

---

## TAULAPAPA VAITAGUTU TAUAITU FATUVALU

### NUMIAMASASULU LALE FAUMUINA AF

6 Ianuari 1949 - 29 Novema 2021 (72+10+24)

Na soifua mai i le Aso Tofi 6 Ianuari 1949 a e tuua le malo i le Aso Gafua 29 Novema 2021 i se gasegase ua 11 tausaga o feagai ma ia. Ua 72 tausaga, 10 masina, 24 aso na soifua ai. O ona matua o Lale (tamā) ma Leausaoleafi Su'e Faumuina (tina). Na faaipoipo atu ia Fanuatanu Toafā o Luatuanuu. E to'a 6 le fanau (3+3), 21 fanau a fanau, toa 1 le fanau a fanau a fanau; e to'a 28 na tutupu mai ai. E silia i le 30 tausaga o lo la tofi tiakono. O le 2009 na su'e ai i le su'ega A'oa'o Fesoasoani ma faamanuiaina ai. O le taitai pese mo tausaga e tele, sa avea ma komiti o le Alofa. Na tofia i le 2015 e fai ma Taitaifono o la matou aulotu.

Sa faia lona sauniga faaleaiga i le Aso Sa 5 Tesema i le 3.00 afiafi i le malumalu EFKS Lepea. O a'u na taitai. O le Aso Gafua 6.00 taeao na faia ai e le Pulega ona sauniga amata i lona maota. Sa taitai le susuga i le toeaina Misipalauni Faatau FT a e tatalo Kirisimasi Sani FS. O le 10.00 taeao ona toe sauniga sa faia i le malumalu EFKS Lepea. Sa ou taitai, tatalo le A'oa'o Fesoasoani o Sooalo Fiu Solomona, faitau le Tusi Paia e le A'oa'o Fesoasoani o Sufia Onosai, a o le Upu faamafanafana na saunia e le afioga Tiakono Katoliko o Etilasi Eti.

O ona molimau na saunia e le faletua ia Fanuatanu Toafa, Ulugia Fatuvalu (sui o fanau), Tofilau Siose (sui o uso/tuafafine), afioga Taulapapa Brenda Heather-Latu (sui Aiga sa Taulapapa), afioga i le Faumuina Opapo Le Tupufia (aiga), o le Faifeau Samoa sa fai ma sui o lona aiga i Iva, a e faai'u i le molimau a le faifeau Epati Setefano FS (o loo malolo le Faafeagaiga susuga ia Esekia Peneueta FS). Sa faai'u ona toe sauniga i lona oliolisaga tumau i lona aiga lava i Lepea, ma faamavae atu ai ia te ia i le Pese 268, *Talofa uso e, tofaina oe.*

O sina talaaga o le olaga o le tamā. Sa lauiloa i lana galuega sa faigaluega ai i lona suafa TAUAITU e oo lava i totonu o le nuu, le aulotu ma le Ekalesia. O se tamā e toaga i le lotu vagana ua ma'i pe malaga pe afai foi o ni tuatuagia talafeagai. E lotu le taeao faapea le afiafi auā e aufaipese uma ma le tina ma le fanau. Na te taina le logo i le tele o sauniga auā e alaala lata ane i le itu i tua o le malumalu. O lona galala faaleagaga lava lea e afua ai ona fiafia e auai i Potopotoga ma Tofiga faale Pulega, Matagaluega e oo lava i Mafutaga e fai ai Pepa o le Tusi Paia. E tau mulimuli i lana faifeau i Fono Tele e auai ai. Sa avea ma Usufono Tiakono, po o le usufono Faifeau ma A'oa'o pe a tuatuagia lo matou faifeau. O lana sailigamalo lea i le Atua na i'u ai lava ina filifilia e le Matagaluega Faleata e fai ma sui tiakono i le Komiti Aoga 2016-2019.

E tafatasi le tele o molimau i le soifua auauna, tautua lelei, tautua matavela, tautua afutoto, fai mea lelei, fai mea sili mo le lotu, e loto maulalo ma loto alofa. E tausi mamalu, e faaea aiga, faaea aulotu a e sili ai lona faaeaea i lana faifeau ma le aufaigaluega tofofi o le Tala Lelei. Sa faavae la'u molimau i le upu a Paulo, *“Aua nei faatagā auauna, pei o e faafiafia i tagata, a ia faapei o le auauna a Keriso, o e fai le finagalo o le Atua ma le loto, ma le fiafia, o loo auauna atu i le Alii, a e lē o tagata. O iloa e outou o lē na te faia se mea lelei, e toe maua mai lea e ia mai le Alii.” Efeso 6:6-8.*

TAUSI FAIFEAU - O taumafa o aso uma, a e le misia le suavai i le Aso Sa. A fai se galuega a le faifeau i le malumalu po o le maota o le galuega, e tapena e ia le tausiga i le aoauli pe fia lava aso e fai ai. E mataala ma tapenapena pe a malotia le maota o le galuega.



‘A’AO FOA’I - O le tele o tofi e lauga i le matou falesa e tapena lava e la’ua ma le tina o le aiga se faatamalii e ta’u ai le aulotu. O lona alofa i le faifeau i le taimi na le nofoia ai le nofoa 2006 - 2020. Ua siitia lona alofa ma lana upu e fai atu pea, **Tautuana le tagata ese, le tagata o le Atua, o le auauna a le Atua o loo mau ma oe.** E lē pa’ū lo latou aiga i mea fai, e atoa saofaga i taimi uma. A fai ni ona faalavelave, e lē galo le nofo tatalo a lana faifeau.

OLA FAITAULAGA - O lana matua tau’ave i soo se faiga taulaga, **‘IAIAISE MOEMOE FOU’.** E si’isi’i lava i luga i tausaga uma ana taulaga e fai, e lē tumau i se fuainumera. O le tagata ua ia mautinoa, e le taitai ona lava ana mea ua ‘ave mo le Atua, faatusatusa i manuia liligi ma sasa’a mai e le Atua mo ia. **‘E tupu mea ave, a e le tupu ni mea e teu pea.’**

E FAAMUAMUA ISITAGATA - A tufa e Tauaitu fa’aalologa e tofi uma lava matafale ma sina mea, a e leai se mea na te ave. E lima lelei ona o lana lea masani. E lē faapa’ole lana tautua pe tau ina ia faataunuu, sa fai ma le loto, sa fai fiafia. Sa ia mautinoa e lē o se tagata ua auauna i ai, a o le Atua lava. Ua gausia le to’oto’o sa puipui ai Si’ufaitoto’a o le nofoaga o loo pāpā ’a’ao ai le susuga i le Faafeagaiga Taulagi a Faumuina le Tupufia. Ua mafuli le laau tele sa tupu lauolaola ma lauusiusi i Si’ufaitoto’a e autovaa atu i ai le aufaigaluega ma le Pulega i galuega fai pei o felaugaiga ma faamati. **“Amuia lea auauna, pe a sau lona Matai, e maua mai e Ia o loo faapea ona fai.” “Le auauna lelei e, ma le faamaoni, ua e faamaoni i nai mea iti, ou te tofia oe e pule i mea e tele, ina ulufale mai ia i le fiafia o lou Alii.” “Amuia e ua oti, o e ua oti o i le Alii, e amata i nei ona po. O lea lava, ua fetalai mai ai le Agaga, ina ua latou malolo ia latou galuega tigā, auā foi o a latou galuega e mulimuli ia te i latou.”**

Ia manuia lau malaga. Tatou te toe feiloa’i.

*Saunia: Susuga Epati Setefano FS,  
Faifeau Nofo Aiga, EFKS Lepea,  
Matagaluega FALEATA.*

## **FAAPAIA MALUMALU** **EFKS MAOTA**

‘O le Manai mai le Lagi’ le suafa o le Malumalu tapua’i fou o le EFKS Maota, Faasaleleaga na faapaiaina i le Aso Tofi 23 Tesema 2021. O le faletua o le afioga Taitaifono Fono Tele, Tekimatang Iosefa Uilelea na ia alalua le lipine sinasina e faailoga ai le tatalaina aloaia o le galuega. O le afioga i le Matuaofaiva, So’oalo Faamanū na ia tatala faitoto’a se’ia ulufale atu le ta’ita’i o le sauniga, susuga Leaso Tupa’i FT, le afioga Taitaifono Fono Tele ma le faletua, susuga Toeaina o le Matagaluega, le Pulega ma le auvalaaulia. O le afioga i le taitaifono Komiti Au Toeaina, Asotasi Gu Time FT na valaaulia na te fofogaina talosaga, o Mose Tanielu FS (EFKS Puleia) na faitauina le Tusi Paia, a o le Failautusi Matagaluega Faasaleleaga, susuga Epati Amosa FS (EFKS Sili) na saunia le lauga. O pese ma viiga o le Atua na lagiina e le Aufaipese EFKS Tafua i le ta’ita’iga a le susuga Niulala Kupa FS ma le faia’oga ia Fagaomanu Makelani.

O le faafeagaiga susuga Falevi Petana FS na saunua i le Tala o le Galuega. Ua 67 tausaga o le malumalu tuai, a e le’i mafaufauina se galuega. Peitai na faate’ia i latou i le 2017 ina ua fautua atu le susuga Niulala Kupa FS ua tataua ona silasila i le saogalemu o le lafu mamoe ne’i afaina i se faalavelave. Sa tauaao ane foi le \$5,000 e amata ai se galuega. O iina na amata tapena ai loa sailiga tupe ma fuafuaga mo se malumalu fou, ma o le ala foi lea o le faaigoa i le Manai mai le Lagi. O le 2020 na maua le \$37,000 i sailiga seleni, ma le nogatupe mai le NPF e \$150,000. Na alu le malaga su’e tupe i Pago ia Fepuari 2021 maua ai le \$13,120, o le masina foi lea na tuuina ai i lalo le malumalu tuai, maua ai le \$15,205, ma amata loa le galuega ia Mati 2021. O Tusi aisi e \$7,300, ma fesoasoani mai le faletua ia Maiava e ala i le Bingo e \$25,304. O le fua o le malumalu na fausia e Matafale e 12, e 70’ x 40’ i le tau e \$348,089.88 e le aofia ai vaega na ofo atu e le Aulotu ma e sa agalelei.

O le afioga Taitaifono Fono Tele Iosefa A. Uilelea FT na saunua e faafetaia le faafeagaiga ma le Aulotu, faapea le Matuaofaiva ma le Aiga Salemalama mo le soifua tautua faatuatua i le Atua. Ona ia tauaao lea o le meaalofa \$20,000 a le Ekalesia Aoao. E faaopoopo i ai tupe na maua i le Posiva \$27,735 + Tusi valaau \$36,700 + Taalolo \$51,000 = \$135,435 le aofa’i o le manai mai le lagi na maua i lea aso. Malo galulue, ia i le Atua pea Lona viiga e faavavau.



**TAULAPAPA VAITAGUTU T. F. N. LALE  
FAUMUINA AF(UA FFI I LAGI FOLAUGA)**



**LAUPAMA TOKAN FS & VAITOOMULI  
SOLOMONA, FEAGAIGA EFKS SOGI.**



**Rev. Laupama Solomona ma ana aumea**



**Totonu o le Maota, AFEGA O LE ALOFA**



**Sui o le EFKS Apia & Nisi o le Au Valaaulia, i le Faapaiaina o le Maota Faafeagaiga**